



在亭叢彙卷十

長洲 李 果

書王伯穀手簡



伯穀少遊衡山待詔之門其壻元善子長即待詔孫和
州學博嘉子也此詩與札皆伯穀寄其外孫彥可者字
懸腕中鋒書大小不一游行自得之致神似待詔伯穀
五子俱幼家事俱彥可代理子曰無田無留者又即從
彥可學以甥而課其舅非古誼獨持者不能也待詔文
章德望傾動海內其門下士如陸少卿子傳王吏部祿
之彭隆池年周公瑕天球陳白陽道復皆得其流風餘

韻伯穀詩與文實相上下札語皆疎落可愛彥可之子
端文裝爲兩冊後有中書震亨跋並百餘年矣閱之見
吾郡前輩風流具在也

書文子長詩

雁門文元善子長和州學博之子喜爲詩詩頗多不自
收拾此數章其四世孫含得之友朋家或殘扇斷簡搜
羅者也子長喜作畫多藝能鑒古博物及花石禽魚之
玩漁獵騎射招諸故人張燈飲酒爲樂不愧佳公子既
後復治田而田多菰蔣鮭蚌子長不以爲意也雅不欲
以詩自衒其外舅王伯穀數數稱其畫與詩待詔風流
文采子長無愧家法焉此詩雖止近體真比於鳳毛麟
角矣

書邵僧彌小簡

邵僧彌初名高居長洲之陸墓里自父之翰以上二世割股療親疾至僧彌嘗三割股以瘡其父母能詩善寫山水兼真草書此卷不知何時作皆寄令和本邱姓居西郊之桐八紙圓健有王大令風予考令和本邱姓居西郊之桐涇工鐵筆與顧元方齊名亦能詩札中所云九章會文九章者即金孝章先生初曰朱袞字九章兵後始易今姓名其時猶未棄諸生與僧彌居母憂皆在崇禎中及今蓋百餘年矣前輩敦篤友朋之真誼蹤跡之離合於此可想見之亦幸事也

書蔡在谷先世遺墨後

予過蔡在谷書堂出其曾祖以下遺墨一篋見示歎在
谷謹守先澤餘百年而猶在此孝子慈孫之苦心能表
見其世德也蔡爲洞庭西山著姓在谷之先自前明萬
曆間遷郡城于蕃先生諱之宣天啓辛酉恩貢廷試第
二初明先生諱德熙吳邑諸生松岩先生諱鎮布衣績
學此在谷之曾祖及祖父也三世皆立品方潔爲耿介
士平生墨蹟散失者多在谷於族人間蒐輯片紙隻字
皆不忍棄松岩先生手輯四書正解在谷欲謀付梓而
力不逮輒於邑予讀于蕃初明兩先生遺訓語雖不多

在學堂卷十
四
平淡無奇而立身行已爲學之道已在於是先人家世之清貧經學之深粹一一如見士君子被服古人誦法其言語文章爭自以爲抗衡昔賢夷考其行而往往背馳者有之矣嗚呼若蔡氏世德若茲非矯矯不佞者歟予與蔡氏稱通家先君子嘗受經於蔡雪觀先生諱德烈之門即在谷從祖也蔡名德之後而在谷又孝友力學有文吾知後賢必有興起能保此遺澤也

書慕廬先生手簡後

手簡十餘紙乃慕廬韓先生寄某翁者其中興會所言不一而約略多蘊懷玉峰徐尚書事初康熙庚午尚書領書局於洞庭東山先生排纂隨左右官斯土者與尚書相讐構奸民撫他人事牽連及尚書禍至不可測門人賓從搖手不顧獨先生於波撼震斃之中挺立相依謗燄亦漸息師友之義始終不渝觀此簡益可知矣是時

聖祖皇帝有大小臣工各釋朋黨之諭乃知
聖主深仁久在覆幬之內其事載先生所撰尚書及相

在唐詩集卷十
五
國墓誌中并記之

何昭夏梅花詩跋

詠梅詩梁元帝與陰何最著唐則僧齊已賦之尤多者
宋陸放翁張澤民動至二三百首然要必以林和靖暗
香疎影爲千古絕倡何子昭夏探梅鄧尉山著詩四章
意遠辭鍊平正中有古澹之致讀之彷彿穿雲渡水登
萬峰之巔使人神往誰謂古今人不相及哉昭夏好遊
復精繪事嘗歷楚南衡永寶諸處又嘗登黃山天都峰
絕頂作畫吟詠頗多皆可傳誦而予尤愛其舊作香國
梅爲海人家花作田之句惜不附之於後也

書贈吳孝子詩卷後

宿遷孝子吳世瓚尋其父走數萬里所歷海內外士大夫及山澤之有識者皆贈以詩次而集之凡若干首初孝子甫五歲父他出生母亦即世踰十年孝子與庶母訣誓不見父不歸遂從蘇州至上海會有傳其父與胡生販布往日本者孝子即附舟徑渡海至日本不可得乃至琉球歲辛卯抵寧波復有云往長崎者長崎在琉球東往返十有九月不能得復從寧波抵朝鮮因遍歷朝鮮附近諸國若甲刺巴交趾紅毛靡不周歷癸卯復至蘇遇賈客鄭生鄭生故熟遊關以外者孝子授零丁

五百紙屬其黏之要路乃復從水路西入蜀越一年至黔中晝夜行達滇南遂入兩粵道楚湘經豫章返浙江航海至閩出臺灣時康熙六十一年矣再至蘇由濟上歷齊魯雲中秦中俱不得蓋歷中原者幾遍孝子亦苦矣哉雍正元年從棧道重入蜀復至滇黔留三載踰長沙將取道去京師夫以孝子五歲失父音容笑貌不可記憶徒步出門纔十五歲始於康熙四十一年癸未迄今雍正十二年甲寅爲春秋三十有一歷省十四外國七爲程則數萬餘里茹蔬斷酒黧面繭足南北東西偃偃無定過家門不入中間蠻煙瘴雨危崖絕澗山妖木

魁虎狼虺蛇與猺獠睚眦欲噬無所不歷而涉海則魚龍之出沒濤浪之洶湧帆破桅裂飄搖震蕩心憂悲悻飢寒疾病蓋瀕於萬死一生者屢矣幸而不死天地鬼神實相之非至孝所感而能若是歟先是孝子至杭州值武進趙恭毅公官浙江巡撫行部東城孝子自委巷出衝其節鉞公贈以詩云尋父頻年願未酬龍潭虎窟幾驚憂白雲迷跡心無定夜看窗前碧海秋因嗟訝久之今距趙公官浙江時積若干年而孝子之行愈苦使趙公尚在其嗟歎更何如也孝子父久文字爾立補歛縣廩生本葉姓僑居宿遷之六里橋母李徐州人亦早

卒胡生即爾立之甥以貲屬其市布乘爾立出挾千金以遁爾立感憤而行蓋康熙三十一年事今屈指爾立亦年近七十矣而孝子至性顯誠備嘗危苦歷三十一年之久其境彌困其心彌堅所謂孝之至者身有所不顧吾卜其他日終得見也予又聞孝子客洞庭東山遇方士為設壇致其神而令孝子遙望見其父黑鬚彷彿如五十許人而不可近意者父子精神之交若有以默慰之者耶歲之九月予與孝子萍遇金閭見其面有憂色言輒泣下不止且出諸贈言相示時孝子將北行出關遂書於卷後蓋悲孝子之志因以愧世之親在而不

知孝者

題華西園詩

華子西園詩才淵博五古蒼秀絕倫近體亦溫雅七古
 雄橫跳脫有天機流轉之妙駸駸乎超元祐淳熙而上
 時俗所僅覲也已酉秋偶與雲川臯里兩太史舟過槎
 浦海潮初上秋水時至夜半見月華新吐相與披詠是
 卷傾倒不置詩之佳境正復類此

書杜雲川太史上嵇相國辭舉鴻博書後

昔人謂韓昌黎上宰相書言多悲慨蘇氏父子投執政書多曠達而激昂曾南豐上歐陽公書綴語種種斟酌然皆意有所請或欲見其抱負而此以謙退誠摯特勝要之太保公之薦賢太史之辭薦各以其道均為得體矣

書王節婦傳

吳江潘晁作

予讀王節婦曹氏傳而慨然於大復讐之義也婦之於夫猶子之於親也春秋公羊傳曰父不受誅子復讐可也况斃於盜者乎節婦以弱女子顛當事懸賞金卒肆盜十九人於市是豈尋常守節者所能幾哉小戎一詩孔子錄之嘉女子之明大義也我鄉汪前輩鈍翁壽節婦文盛稱其能復夫之讐以守節有以夫

書宋貞女詩後

長洲程樹玉生聘室曰宋氏玉生才而歿氏以死誓父
古農公歸之於程以遂其志不及侍姑奉其舅盡敬禮
詹事錢柘南編修邵北崖蔣西原三君子各述以詩而
臯里楊編修又爲之立傳宋氏尚存而傳之者明乎全
其爲貞者也考之戴記未取而女死壻齊衰而弔旣葬
而除於夫死亦如之蓋未成乎爲婦也而楊編修著論
引栢舟之篇明共姜之未嫁夫子登其詩於風見貞女
之行合於經夫編修之所據誠不易矣愚竊以爲昏禮
問名納徵女雖未嫁而名已通乎夫之家身旣受乎夫

之幣矣女子之道名不踰外閫幣不相交接則妃匹之義自茲定焉不俟奠鴈共牢爲與之齊而後終身不可改也且後世夫婦道苦聞貞女之風當必有感慕而興起者於閨門之禮王化之原所助寧淺鮮乎固未可泥戴記之文而或有疑已玉生年十二通十三經爲弟子貞其卒也以哭大父之喪宋氏名景衛通經能文紹興守定業女孫潮州同知志契女也三君子之詩思深而旨遠其亦得古風人之遺者云

書東坡佛印論道圖

蘇文忠公與辨才叅寥了元爲禪友而與了元尤契風流調笑别有超詣了元即佛印也吳人柳遇工人物寫公巾服坐石磴磴後石几陳書一冊佛印則袈裟相對若談禪者溪山深秀流雲過樹筆頗閒逸予見公雜志元祐四年公以龍圖閣學出知杭州過潤訪佛印於金山寺佛印有轉語公擬議未即答戲請以所繫玉帶鎮山門又詩話載公喜食燒猪佛印嘗燒猪以待一日爲人攫去公作詩有云遠公沽酒飲陶潛佛印燒猪待子瞻之語而先是元豐五年五月公官黃州於齊安江上

得怪石二百九十八枚又得古銅槃以盛石注水時佛
印在廬山即以為供復紀以文佛印為刻諸石此兩公
之蹤跡往還也不知此圖所寫何地而所談者又何語
耶公早悟淨因其自寫生平見於惠淨師贈石絕句序
自覺出處粗似樂天樂天恬澹嘗與香山浮屠如滿結
社白衣鳩杖自稱香山居士公庶幾相類圖之益見其
心性超朗可徧歷劫幻也

侍郎周公神光寺募疏跋

福州神光寺修建法堂募疏順治八年辛卯戶部侍郎
周公櫟園官福建右布政使時為浮屠如敏所作藏於
寺雍正十年壬子公之孫鴻舉任福州府通判迎養其
父廣德公於治所隨之至寺如敏七世孫雲機出冊以
示蓋歷八十餘年蠹蝕過半而墨蹟飛動鴻舉手捧痛
泣既重為裝潢念先祖手澤寺僧奉為世守不欲攜歸
令其子世祿錄一通即此本也按年譜公是年以代建
南道自汀州還福州方在汀招撫土寇曾省之餘復代
篆赴延平時邵武有耿虎之亂公單騎往諭虎降此疏

引其殆赴延平之前作耶果嘗讀公所爲文宏博磊落不依傍門戶據案疾書皆衷於理義嘗以書生領兵事平海寇十數處於金戈鐵馬中不廢吟詠詩亦多歲庚戌在江寧忽夜起慷慨太息盡燒其平生纂述百餘卷以是留者絕少其長子在浚搜輯爲二十四卷而此篇以藏僧寺獨存此鴻舉之所以寶惜重錄也余又聞鴻舉官閩方修通志以公治閩事蹟請載入主者有難色乃追求順治間遺案得入志立名宦傳又邵武有詩話樓以宋嚴羽滄浪邵武人與戴石屏論詩於此公請祀於此樓以詩話名後人以公有全城功又深於詩遂以

配祀兼泐公寒食登樓詩四章於壁傾圮者再鴻舉與邵武守王君實修之亦以念祖德也昔唐薛元超轉中書舍人省中有磐石祖道衡爲侍郎時嘗據以草制元超每見石思祖輒流涕而魏曹休祖父嘗爲吳郡守休後亦爲此官見壁有祖父畫像乃下榻涕泣昔人於其祖一畫一石緬懷興感矧爲祖之文筆乎而鴻舉又官於其地宜其泣然不置也公之四子在延有過濤青軒讀募疏引詩六子在建有神光寺詩附錄於後在建曾知廣德州即鴻舉父也鴻舉後爲蘇州府管糧通判有賢聲乾隆七年九月長洲李果跋

書彭念堂秋山行李圖卷

情爲天地之膠漆於朋友尤甚是非得失悲憂患難以
至關山古道之窮愁旅思羈魂之悽惻朋友能知之亦
朋友能道之也情者交友之端也漢陽彭念堂與長洲
過欽頤交於逆旅彭子能詩而過子治幕學方負米四
方悵悵無所之彭子將歸漢上爲寫秋山行李圖崇山
疎樹雲煙遠近舟泊大江一人俯身臨水際而負擔者
在後題詩其端旨深而思遠蓋過子亦將遠行合并不
可知彭子之爲是圖意他日終有遇也蓋兩入之情深
矣予謂多情累於至道戰國遊士樂於說之易合不知

有道之可信而西漢人好傾心沽美譽相率而爲之者
得不勝其失昔人具嘗論之若二子者持已以道具有
至情而能不易所守雖范張何多讓哉丙辰六月書

書幕府躬耕記後

幕府躬耕記鶴江邱某爲休寧潭渡黃子宗夏作文約
五百言仿六朝儷體而運以宋人之筆後附詩二首當
雍正初宗夏客廣西提督韓將軍幕廣西古百粵地襟
五嶺連兩越外控交趾海徼溪峒西南瀕接稱險峻凡
耕於野居於室行於道塗處於卒伍者咸仰韓公爲保
障而宗夏實襄贊之厥後韓公奉命提軍會滇督平
苗彝宗夏崎嶇軍旅規模布置著有勞績韓公倚之不
啻如左右手宗夏於廣西衙齋墾隙地藝稻以驗歲之
有秋遂傳爲美談邱君所由記也夫諸葛武侯種菜郭

汾陽河中負耒至今稱說若宗夏者大小雖殊然其心
寧有少異哉宗夏名曰瑚好學喜交遊嘗遊廣陽劉獻
廷繼莊之門繼莊歿於蘇門弟子遠近會葬者數百人
莫不以宗夏為歸宗夏父家悌字復庵曾居吳甲寅乙
卯間為讐家所構繫長洲獄十四年獄中疊石為小山
種竹樹纔盈尺鑿池養魚以自娛有張翬者復庵友也
亦以事繫兩人相與日夕考經義讀史不休囚多怪之
當是時宗夏學成欲伏闕上書訟父冤中道聞釋乃
歸復庵事既白乃徧歷齊魯燕趙荆楚間後遂徙城西
九龍山不復入城市蓋異士也宜宗夏之志行為不群

歟宗夏門人毛生出記見示為書其後時乾隆三年大
暑日

書徐侯齋芝蘭畫後

侯齋先生申酉之交隱居上沙澗上嘗終身凍餓惟寫山水自給間寫蘭與芝草其畫皆在筆墨之外今圖中雖一二筆而孤介之概可與宋人鄭所南頡頏侯齋嘗謂所南之蘭寫其怨要之必有所寄託也當乙酉之歲文靖公執侯齋手泣曰我固不可不殉國若即長為農夫以歿世可以無憾時侯齋必欲相從地下既後追感遺訓耕桑谷飲岌岌留此身以為故國之完人其志亦良苦矣其在山中專精史學又嘗輯廿一史文彙通鑑紀事類聚二書其紀事者部系以事事系以論其間治

亂興亡之數較晰毫釐得春秋之義惜其書不知歸何人予方分纂郡志遂書其事於隱逸傳乾隆十年九月霜松草堂書

書高南阜背匙圖

向背之論靡有定也我以為向衆以為背向者背矣我以為背衆以為向背者向矣人知背之為背而不知向之亦為背故向背之說靡有定也駟鐵之次章云公曰左之舍拔則獲獲之有宜於左而不終為背也然則南阜之左其匙安在非南阜所獲之多乎南阜可無嫌於左矣

背匙二字見冷齋夜話予與李德修游公藝同詣新貴人予三人皆左手舉箸貴人曰公等殆左轉也予應之曰我輩定須還左轉如君豈是背匙人匙音與

在亭叢書卷十一
三
時同蓋背時也時南阜以病右痿方罷官江撫都御史文登徐公既爲之贊而屬予題其後

書范貢庭塞北省親圖卷

塞北省親圖一卷貢庭范子將省其尊人太守君於大同會承太守君命奉其祖母太夫人就養於官及叔氏偕行而圖也作圖者爲里人陳必大而富陽董太史東山爲補其出居庸關塗中之景圖中巖嶂蒼莽亭堡絡繹老樹拔地黃塵際天鳥道盤空而上塞北之地宣府則山多而少樹大同則山高而多土此其大略也貢庭以雍正甲寅秋八月抵京師始出關乙卯夏六月乃歸往返絕塞經萬里餘可謂勞矣昔唐狄梁公過太行見白雲孤飛曰吾親舍其下劉禹錫爲播州刺史御史中

丞斐度爲言播州極遠禹錫母八十餘不能往帝易連州而漢書載雋不疑爲京兆尹每行縣其母問多有所平反輒喜笑言語異於他時否則怒之三人者事各不同前史皆述之爲美談今貢庭奉祖母以行旣得免梁公望雲之思而大同古晉冀地去吳四千里風土淳厚非播州比太夫人康強能親至其治以觀新政無煩易州治而其爲良二千石居股肱要地寬仁得民民以無寃則又得不疑之敏有以慰其親心是圖也貢庭父子之孝思於此並見洵遠邁昔賢者矣至雲中三面臨邊河流環折爲漢魏尚李廣舊所守地雄風猶在 本朝

德威遠播邊塞之地烽燧無警貢庭美才華能文而個儻按轡之餘登高憑覽得母有感慨於昔而幸承平之盛以見之歌詠者乎予知貢庭不獨奉親爲孝子他日克繼其父爲勞臣也

書陸茶塢秋江芙蓉圖

離騷經云集芙蓉以爲裳蓋以被服之潔鮮喻修善之
明著也而古詩十九章其六章曰涉江采芙蓉則又以
寓思友懷人之旨至唐高蟾有不怨東風之句說者乃
謂其能安於所遇焉蟾之意亦本之於離騷離騷曰不
吾知其亦已兮苟余情其信芳蟾之不怨非斯意乎茶
塢寫秋江芙蓉而圖其貌於旁其懷友之思乎抑不怨
之志也茶塢高懷磊落豪於酒喜交當世士當世士樂
與之遊槃筭之會無虛月當不至別久而有思然茶塢
好吟詠坐明瑟園嘯歌於中徜徉自得則又非寄慨於

不我知者賢者固不可測余幾無以測茶塢也

徐瑤圃畫雲間往哲遺像跋

華亭徐璋瑤圃摹寫雲間往哲像始於大學士全公思誠終陳黃門子龍共一百十人蓋勝國二百七十年凡忠孝廉節文章理學悉登於冊瑤圃筆意蒼秀茲冊又所加意英姿颯爽德容肅穆仰止之思不覺油然而生夫前賢登臨之跡一樹一石猶動人流連矧瞻其眉宇恍如聆其警欬者乎吾吳先賢像爲錢叔寶手筆錢允治功甫欲歸之文文肅公有貲郎以厚利願交於功甫功甫不可文肅感其意至質其家藏宋槧史記酬之後人爭賢功甫然何如瑤圃之自爲寶愛乎乾隆五年九

書葉母杜夫人遺像卷

夫人黃岡杜于皇先生女葉桐初隱君之配此像夫人年二十餘女史朱洵所作其子子山出示予于皇名濬明季乙榜官鳳陽府推官兵後隱江寧鍾山著有變雅堂集爲海內推重桐初名藩父慎行歲甲申以諸生殉國難桐初居太倉之沙溪痛父志節不應試而專志於古學于皇來太倉見而愛之許以女後就婚江寧遂僑居焉此蓋僑居後四五年所圖也桐初客遊遍四方于皇死乃移家來蘇未幾歸沙溪舊居既又至京師歸卒於塗之新城桐初爲予祖母葉淑人姪方夫人居蘇予

年十四五屢過其居夫人治雞黍間出餽飫食我既歸鄉予以事至沙溪復見之最後夫人卒年至七十餘今乃瞻其少時之像雖未逼真而夫人之賢淑亦可想見矣予聞于皇屬其客爲太夫人寫像太夫人艷然不許于皇慨歎言悔不學寫照今夫人之像出自閨閣之筆亦猶于皇之意也子山今年亦七十餘矣其什襲藏之桐初客燕京屬禹鴻臚尚基白描戴笠像沙溪廬墓圖合一卷惜失之僅王太常煙客王廬州元照所寫白雲圖多吳梅村陳言夏魏叔子諸公題辭尚在耳乾隆四年二月表姪李果記

題周庸客小像

無機抱甕汲有道帶經鋤庾子山和永豐縣侯言志句也漢陰丈人爲圃畦鑿隊而入井抱甕而出倪寬鋤罷休息輒讀誦兩人之志行固高矣周子庸客澹泊自宜遊心於道能忘乎機而不移所守寧迂拙勞苦而不趨便捷之徑以是所得獨多此其人殆有味乎子山之言者歟亦可以知其風矣

跋甘泉漢瓦

漢甘泉宮瓦山陰楊畊夫於閩中搨以歸者瓦徑五寸
強背平可研墨銘有四字其文曰長生未央字蹟絕古
雅蓋侯官林同人從父宦遊長安得之淳化縣亂山中
而此本今則歸之周季子往予見秀水朱先生竹垞搨
孔廟五鳳二年甄吳寶鼎甄又摹此瓦合裝成一冊又
爲同人賦甘泉漢瓦歌紀其事漢歷今二千餘年甘泉
未央飛樓連閣若三輔皇圖西京雜記所載者皆已淪
沒而此瓦出於風霜灰燼荒煙蔓草中流傳至今寧非
厚幸哉周子篤於好古其得此搨本寶之不啻如拱璧

也壬戌十二月鷹揚里書

題朱翁所藏畫卷

以下題畫十首

古人論畫謂筆墨之外有一種逸致乃為神品此卷不知何人所作絕似高房山又如米虎兒其皴染之法若作草書全不經意而結束入微遠山蒼茫林壑欲雨咫尺具千里之勢晴窗披玩恍疑遊洞庭西麓長沙漁洋皆在几案間也

仿巨然畫

惠崇巨然皆以高僧逃於畫禪惠崇以豔冶巨然以平淡澹各有所入巨然師董源嘗寫松亭雲岫圖而筆則超矣此摹仿巨然頗有不經意處雲峰石迹迴得渾穆之

致觀此可以知畫

撫琴圖

琴之道淵微乃聲音之至妙歐陽公所謂純古澹泊與夫堯舜三代之言語孔子之文章易之憂患詩之怨刺無以異其能故使怵戚者聞之含哀悞咿和平者聽之怡養悅愈其感人之深有不可解者焉世傳伯牙鼓琴子期輒能稱善子期死伯牙破琴絕絃終身不復鼓蓋調高爲難而知音尤不易得也觀此圖中層巖絕澗一人刺船正襟危坐撫琴一采樵者隔溪倚擔靜聽絕似伯牙子期有神遇之樂偶一展觀覺海水洞湧山林杳

冥不待奏水仙之引亦足移我情矣

楊子鶴春景

虞山楊晉子鶴爲王翬石谷高弟其寫山水本之黃子久而得其師法又善寫真及牛此幅清麗似元人趙大年筆春山綿邈蒼翠欲滴野田茅屋漁舟沙鳥各有其致而野人相訪情話如在恍如坐我水村不知身之在塵境也按其畫時子鶴年八十三矣是歲潛江宗人恒堂官蘇州郡丞曾乞其畫得水墨梅一兩枝疎花數點老幹可愛蓋已不能更作山水而此獨嚴整如是神韻生動流溢於絹素間不易多得也

馬栖霞山水

昔人作畫山水花鳥兼工不拘一格 國朝惲南田壽平寫山水極高曠與王石谷暈齊名後見石谷筆墨深邃遂專事花卉得徐崇嗣法予往見其山水小冊意在神韻品直在石谷上今觀海虞馬栖霞此幅溪山渾厚一人坐水際看雲蕭閒自得深得梅花道人意栖霞以花卉著名而不知其山水之妙有兼長也畫作於康熙辛巳秋正予於藤水王芋田書樓觀其磅礴下筆依稀四十年矣言之慨然

孫山濤臨文衡山畫卷

孫山濤氏臨文衡山待詔畫一卷衡山手筆蒼秀脫去畫史谿徑與石田並重而各擅勝處古來畫家皆有所本董源寫江南山米元暉寫南徐山李唐寫中州山馬遠夏圭寫錢塘山趙吳興寫苕霅山黃子久寫海虞山此卷大似吾吳天池山龍池石壁長林深澗巖谷幽邃其村落人家似未寫竟者蓋就真本摹擬絕不點苔用筆簡淨可見山濤嘗從王侍郎麓臺遊討論六法往往筆墨之外別有天趣此仿文氏而氣韻獨見固宜蘿軒學使之稱許也

顧大巖畫龍

龍被五色而遊故神小則如蠶蠋大則涵天地則凌雲沉則伏泉其說著於管子而世人往往見之圖繪梁張僧繇寫橫泉鬪龍昆明二龍兩圖又於金陵安樂寺寫四白龍不點睛人固請點之須臾雷霆破壁兩龍乘雲騰去太清中雷震龍泉亭失其壁亦以壁有僧繇畫龍也昔人謂其骨氣奇偉取資天造得心應手今古獨絕者矣顧子大巖長於山水心師古人而不泥其迹有黃子久浮嵐暖翠之風偶為旅堂寫龍舉圖絕壁摩天海水飛立一龍蜿蜒乘雲欲起煙霧隨之化工之筆雖僧繇何讓想其興至展穎神與之會不滯於手不凝於

心直以氣運為主近日畫家所未夢見也

汪伯子山水

梅道人山水師董北苑巨然而自成一家一樹一石不為前人蹊徑所壓於元人中首屈一指大癡雲林莫之或先也伯子此數筆頗得梅道人意婁江王日初見之謂兩樹與石絕佳要非妄譽者伯子前羈杭州獄於其小庭補植桃梅杏樹十五六株花時續紛吟詠其下忘其危困可以想其幽致矣

魏西疇仿各家畫

董文敏論畫當以草隸奇字之法為之絕去甜俗蹊徑

不爾縱儼然成格已屬下乘蓋貴能解脫束縛氣韻生
動乃為得之梁溪魏西疇好古能詩復精六法此冊寫
元季四家益以荆關董趙燕文貴九龍山人多種蒼秀
奇橫各擅其長殆集古人之大成自出機軸而得神妙
者歟古來畫家無錫最盛人物則顧愷之山水則倪瓚
王紱諸人魏子生於其鄉流風餘韻濡澤者多宜其盤
礴胸次其流於筆墨自應過人也方今東南名家王侍
郎麓臺以後數王昱日初雲峰木石迴出天機魏子庶
足方駕者矣

趙鹿坪指畫菊花

以指為畫前代無之始自康熙中鐵嶺高使君韋之人
物花木禽獸草蟲不假思索駢指點點頃刻數十幅隨
意飛動無不絕人繼之者為其鄉甘同知士調宣城劉
期侃湛園江都吳弘謨兩山如臯馬芳不群各擅一體
而鹿坪趙子則專寫花草兩山題句尤佳今鹿坪倚裝
為徐春載寫菊花兩枝清芬高潔頗得韋之之意張子
見而愛之春載遂舉以贈兩君殆有同好焉

書汪東村短衣看射圖後

短衣看射圖一卷中騎者步者擁者翼者手弓矢而馳者騎而佩壺臂隼而前後者貌人人殊田犬狐兔各盡其致而短衣跨馬顧盼奕奕欲動者則汪君東村也東村屢躡場屋以貢需次為州判生平負氣好奇時奔走大江南北山東西中州兩粵閩嶠憑陵覽古與彼中文士遊年幾七十矣歎崎歷落之懷如故偶以杜少陵句作圖按少陵曲江詩其三章曰自斷此生休問天杜曲幸有桑麻田故將移住南山邊短衣匹馬隨李廣看射猛虎終殘年蓋聊以寄其不得志之概耳東村豈亦有

感於斯耶東村故鄉新安溪山可以耕釣杜曲桑麻亦
復不減年雖老意氣尚在天如可問此生未應便休與
少陵同不同何如也請還以質之東村

題黃桐菴畫石卷

此卷石十五紙蓋黃桐菴所寫者其狀不一皆蒼潤靈
峭尺寸間具有煙雲涵蓄之妙其子當時掇拾收藏并
以桐菴之尊人聖瑞詠梅諸詩裝潢彙為一卷昔蘇子
瞻好石得仇池石色綠岡巒邈迤有穴達於背後見湖
口李正臣家九峯玲瓏欲以百金買之與之為偶王晉
卿賦詩借觀意在於奪錢穆父王仲至以為不可許獨
蔣穎叔不然子瞻欲易晉卿韓幹二散馬晉卿難之穆
父欲兼取二物穎叔欲焚畫碎石咸有詩紀其事夫一
石耳而欲奪欲碎寧如收之圖畫使石之精神光怪流

傳於縑素固無慮其碎而亦無事於奪耶聖瑞詩字皆淵雅與畫意合是卷也黃氏之祖父手澤具在當時與其弟逢源方以文學著稱於吳睠懷先德庶幾范喬之意願世世寶之也

在亭叢彙卷十一

長洲 李 果 碩夫

王右軍抱鵞圖贊

有序以下贊銘六首

世稱王右軍書法以神悟勝嘗傳其少學衛夫人及渡江北見李斯書之洛見蔡邕書又張岳碑始知學衛夫人徒費年月遂師眾碑而書法益妙此抱鵞圖雖屬近代名蹟神韻如生一童子負書隨後頗得冥悟足為右軍寫照予嘗讀杜少陵詩稱吳人張旭善草書數於鄴縣見公孫大娘舞劍器自此草書長進豪蕩感激即翫驚可知矣乃為贊曰

匪悟則罔匪學則殆偉哉右軍於鷺是愛鷺之宛轉可
通於書如觀劍舞頓挫自如書罷黃庭籠鷺而去千載
風流展圖如故

分湖葉先生像贊

有序

先生爲果祖舅氏諱燮吳江分湖人康熙庚戌進士爲
寶應令有賢聲與嘉定令陸公隴其同爲江撫都御史
慕公劾論去官世並惜之此獨吟圖蓋前明崇禎壬午
年所寫也

四齡讀騷夙擅文辭中歲出宰白田之涓致治有本農
桑是資時當戎馬羽檄交馳才高氣雄觸境危疑以劾

解組嘉定名齊身安退處九峰之西拜瞻遺像六紀於
茲被服嫺雅弱冠豐頤何以見志登高賦詩鯨魚碧海
舞鬣揚鬢杜韓而後庶幾繼之

寶山王孝子贊

王樹聲子實先世居上海城會罹兵亂北徙嘉定今寶
山是名伯兄明孝廉萬仲兄諸生建聲也高逸遺榮幼
孤事母晨夕依膝夏日鬱蒸衣冠秩秩絲粟錢布不以
入私室老母病危念諸兄事親日長兒事親日少母病
不瘳兒心如擣剪左乳肉作湯奉母血流創鉅秘弗道
越六載母亡三年廬墓撫松悲泣高昌古渡

葬母黃浦高昌渡

張君雲章泚筆為誌原委邑令程君國棟載之志乘彰
厥美年四十四終老田里有賢者孫渭筠請旌不得終
歲哀痛靡已嗚呼王君可謂孝子

欵器圖贊為金竹谿作

惟爾體虛乃能受惟爾適中乃正而可守繫斯器之取
象兮戒持盈而无咎視古人以作則兮示子孫以永久

寒山竹石圖贊有序

是圖為王母章孺人作也孺人以節著圖之者蓋義有
取焉予因綴以小詩三章若六義之有比不敢妄擬風
人聊附於塗之謳也云爾

我瞻高山山峻嶒兮不日不月惟其有貞兮

我瞻綠竹竹菁菁兮不日不月惟其有瑩兮

我瞻古木木葉墜兮其樞其楛其不可拔兮拔叶音佩

舫齋銘有序

齋在城西一里許為某氏堂之東廡深約數武前後夾
以兩樓有類於舟顏曰舫齋李子讀書其中當夏赤日
照灼暑氣逼人甚熾即中庭亦不可至客過之謂李子
曰此他人所不能安者而子獨安之殆近於有道者乎
李子曰天下之境不足者常多而有餘者常少若以不
足視之則此又有餘矣又安在其不可耶吾雖身滯一

在亭業學卷十一
室而心方游乎八極之表則寒暑烏足爲我患乎客既
退乃爲銘以自警

莫謂偏側著書有餘下上古曠覽自如
似火烈日如岸高樓我滯我迹同於泊舟
記亦有之曰求毋固卑宮夏屋隨我所遇
蹇爲德基逸則事廢君子秉貞庶其勿殆

太學鄭先生墓誌銘

代吳霸昌作

先生諱鉞字季雅姓鄭氏太學生蘇州之元和人七歲
就塾師於文信國祠日肅衣冠瞻拜擬製祠記塾師異
之弱冠典衣購經史終夜讀之盡焚所作制藝曰此不
足見吾志也乃肆力於詩年二十四遊京師以詩謁尚
書韓公翰林孫公一見稱歎遂以能詩聞既歸學益苦
所作益涵蓄博雅在京時館今大學士海寧陳公所與
纂賦彙康熙辛卯復之京賦彙成先生以格於閣議不
得敘時秉軸者欲羅致門下先生固辭不就歲壬寅復
入都以疾卒年四十有九先是高編修輿嘗夢與先生

衣緇服坐深谷中講道未幾高公扈從塞外病歿先生聞而哭之後一年先生竟卒於京師之永光寺囊無長物故人爲致棺斂子汝暘奔喪扶櫬以歸嗚呼其亦有數歟著有括囊居士集二十卷選昭代清音集唐律多師集他如昭明文選李杜韓白蘇集皆有批解詩學之變久矣務生新者競趨范陸而悅目者專尚元人不失之淺露則流於柔滑先生原本經史而涵泳於漢魏晉宋三唐卓有根柢晚而折衷於王孟杜韓秀水朱太史彝尊嘗致書新城尚書王公謂吳語軟而生詩堅吳人浮而生行狷蓋道其實也而遭時不偶困窮以歿寧不

悲哉鄭氏自宋靖康中南徙居吳明初有諱益者以才試補河南守有惠政數傳至雲山公諱錫孝友潛德即先生五世祖也祖某父某皆隱居不仕配諸孺人某之女有婦德孺人初嫁時裝具甚豐先生二十餘遭外侮橐一空初無怨色孺人以鍼指襄菽水處之晏如後先生十二年卒子男三人汝暘汝莊汝成汝暘亦工詩女一人適繆某汝暘等以雍正十二年八月某日合葬於元和縣匠門塘先期汝暘以狀乞某銘某之先君子於先生爲中表兄弟而某又執經門下受教久謹誌先生梗概於右而系以銘曰

不為貧困憂戚寢食風雅振詩筆瑟琴和樂昭惇德
佳城葑湄鬱秀色子孫世守永無斁

夏處士墓誌銘

處士夏君賂南之卒也其孤溶既謁我友蔡君在谷為
之傳矣復介在谷請予誌其墓在谷於文不苟其傳賂
南也簡而以質讀其傳可想見賂南焉乃為節其傳語
誌之曰君諱鏐賂南其字系出宋文莊公竦後為元和
縣人父曰珍考授州同知母曰姚明文毅公希孟曾孫
女君年八歲盜入寢室君手劒叱盜無驚吾父盜異而
退九歲喪父知盡哀葬其父日止墓所不肯歸至母挽
之乃行奉母五十年得母歡心居母喪不櫛沐不味醯
醬三年鐫木肖父母像奉之推財兄弟而昏嫁其猶子

又出橐中金助凡有喪者又嘗遇遺金於道坐而待以
還其人嗚呼君之所爲如是是可銘也已君卒於乾隆
八年四月某甲子年若干所著有樹萱堂詩未刻配宋
氏大學士文恪公再從孫女爲賢助子四人曰某某孫
男若干人墓在某鄉某原其葬也將俟卜日蓋先期而
請也銘曰
行施於家爾惟庸或恣而澆不敢從以質諸世尚可風
有相厥兆寧此中

吳用霖墓誌銘

吳子用霖吾友珽之孫大鑑之子先世自徽遷蘇州用
霖年十歲而失恃十二事後母十四而同母妹殤二十
而病病半年而歿蓋失母者十年矣嗚呼其可哀也用
霖少歲隨季父讀書城南頗力於學越九年念其家中
落又從其從叔治計然之術從叔好樗蒲諸戲乃捨之
去素羸弱歲壬子病痺會其父患瘍不食飲用霖客都
亭徐氏自都亭至楓橋隔城數里旦暮往來凡兩月忽
晨起眩暈幾不見人亦不以爲憂迨父愈而用霖竟不
起用霖名澍尚未娶大父傷其志將俟其繼母弟有子

而嗣之以雍正某年月日葬於吳縣靈巖鄉母葉孺人之墓傍屬其戚仲君手其事略請予銘予與用霖祖父交善又哀用霖負志行敦孝友不幸疾病困頓以致短折爲之銘曰
其志則苦而憂勞於厥躬其遇則嗇而又夭折以終祖若父心忡忡泉則流岡則崇惟母氏之相依安魂魄於其中

敕封安人蔣母王安人墓誌銘

皇封承德郎翰林院編修蔣公潛廬之葬也楊編修繩武銘其幽宮葬之明年而安人沒又二年諸孤將以某月日奉安人柩祔葬於封公之墓孤編修恭棊手行狀謁果乞銘果賤且不文固謝不獲乃謹爲之序曰昔三代盛王之世所以正身而齊家者非特男教舉也蓋婦順之明章與並飭焉其在禮傳則自櫛緹笄總之儀紛幌箴管之佩醴醢酒醴之供以及絲麻布帛委積蓋藏之事莫不教之以豫而習之有素故其時外內之位正家齊而國以長治者由斯義也婦順之道豈其微也哉

按狀安人姓王氏父曰煥於其姑

皇旌貞孝贈安人者爲再從女姪年二十歸封公爲繼室用恩鞠其前室之女而敬養於其姑又體姑志致禮於姑之父間被誚讓惟踧踖引咎姑居父喪不敢衣純采以見蘋蘩供祭并虔祀其姑之祖父兩世其侍封公也戶以內醯鹽瑣織之事皆躬點檢辨色以起中夜以休數十年爲常性貞靜耀首澤面之飾屏弗進親壻姪至帷其門而與言編修旣成進士無喜色 貽封象服遇禮事始一衣之而又睦於前室金安人之戚隆於已戚保抱庶子女均其恩勤尤人所難能也乾隆五年十

二月十七日卒壽七十有五子男八人其存者曰恭棊恭果繫孫男十三人曾孫男二人以恭棊官庶吉士晉編修加二級康熙雍正間兩遇 覃恩再封孺人加封安人夫以安人行實若茲其能明章婦順以寧厥家而合於禮傳所載者已銘曰

在坤六三貞以含章疇施中梱以順厥常編修有母恪勤內則蘊諸令德 恩綸洊錫起視而石後嗣永式

方母吳孺人墓誌銘

吳於歛之澄塘爲右族孺人太學生諱嘉禮之女贈儒
林郎方翁諱士培介婦而太學君諱良需妻也年十七
歸太學君循內則動止有法不及事其姑徐而事祖姑
鮑太安人以謹鮑太安人喜曰是不愧吾長孫婦翁與
繼姑僑居江右之蓼洲孺人遣使起居被服食飲以時
餽無少後贈公節儉抑奢有古人風孺人之姒汪安人
井曰親操孺人來歸即謝裝飾椎髻布裳身自操作雖
甚勞苦能安之娣姒相處視如兄弟家食數百指後乃
同居分爨然猶每事必請於汪安人相愛敬無間言鮑

在正書卷二
太安人謂不愧長孫婦者即汪安人也太學君卒於江
右孺人秉家政十數年惟以儉勤教其後人以義方雖
一子不事姑息生平無疾言遽怒御下和易而寬肅賓
祭必豐服食則必簡性好施與見孤嫠者哀之飲助親
族之貧無告與婚喪不能舉者垂老不變也卒以乾隆
戊午七月初六日享年六十歲子一人善社太學生女
一人適候選州同潘世璠孫二人大猷大謀孫女一人
孺人有姪善祖善祈幼孤護如己子病且亟善祖客江
右遺以書教之惇孝友無墜先人訓孺人之葬善祖爲
述其事略孤善社走千里請予銘墓在某縣某鄉之原

銘曰

緊恭儉之疇偶實惟令母人知其德音則有也嗚呼洵
可以傳後溪山盤鬱合高阜庶千載以永久

太學生方君墓表


故友方君東華之卒果率執友哭諸其室既又次君行事為家傳授君之孫權閱六年權將奉君櫬葬於吳縣西磧山之原踵門謁曰葬有日矣無以表於其墓敢再拜以請果方卧病然不敢以不文與疾辭也君諱朝先世自閩宦於廣遂繫籍番禺父殿元登康熙三年進士宰江寧郟城二邑有治聲學者所稱九谷先生也去官後僑於吳卒葬焉故君為蘇州人九谷先生邃於學著環書明性命之理詩文出入漢魏初唐北宋間君與其兄還稟庭訓自少時即以作者自命為太學生祿位非

所好也沉潛六經博習莊周馬遷班固劉向揚雄韓愈
柳宗元之文含茹吐納疏達條貫而後出之而又養以
沖和淳澹故其詩歌散文淵然沛然與道大適為可以
垂世而不朽當是時四方名流過吳者皆定交於君集
君所居勺湖賦詩論文無虛月咸自謂莫之先也君事
母梁太孺人至孝待兄及兩姊甚友愛析產與兩姊而
指困粟六百石佐兄費交友盡誠病曰於我館也死曰
於我殯也葬曰於我窆窆也事不可一再計家本素封
以是日破其產而至於困君處之怡然常袖金以赴其
戚之急而不令人覺人以問者固曰無之蓋君勤於施

德而唯恐人知者若此君又再返嶺南省祖墓置田歸
韋涌大宗祠奉烝嘗而以舊產悉散宗人承九谷先生
遺命溥其惠於通族也君以雍正十二年卒年六十子
男五人耕程位豫載皆先君卒孫一人權程出程先為
君季弟常後矣君既卒權始歸為君後葬以乾隆五年
十二月二十四日奉原配周孺人以祔嗟夫君之詩與
文可以垂世而其德亦蓋於一鄉者也自君之歿君之
交遊或顯晦異轍存亡興感無復有表君之行而梓其
遺集以傳諸後者顧以窮老若果忘其非分而表其墓
也悲哉因泣涕以書而揭於其阡之原

同學祭蔣封翁潛廬文

嗚呼昔與編修文章酬倡編修甫冠翁年方壯每造翁
堂攝衣坐上翁出揖賓恂恂禮讓日之方昃几筵以張
肴核維旅肅陳相餉酒酣談劇縱橫跌蕩吁嗟今人罔
知趨向六籍榛莽百家塵埃肆為新聲非庸實罔大雅
不作狂瀾誰障編修挺起追古為抗本深膏實苞含蘊
釀當其下筆雄辭大放江湖百折風雲萬狀韓曾既逝
誰能相尚吾徒啁啁徒為劣相乃知封翁雅善教子當
其髫齡授以經史諸子未醇亦窮厥指毋為淺植務研
至是晨暮諄諄言提其耳編修承訓膏以繼晷遂躡天



原件短缺

P13

根披其奧理掉鞅名場躬紆青紫秘閣書纂承明筆珥
並荷 天恩 綸章覃被階若編修貽封褒美衆走賀
翁翁不色喜兒也無似奚以膺此我聞封翁至孝性成
孩提喪父悲哭嗶嗶獨與母居門戶顛伶况遭險釁外
侮叠嬰翁也實才瘁力支撐雖富於文棄而治生入庭
起居母志以寧翁徙西郊母舍東城間十餘里昏定爲
恒墓田宗祠贊畫經營愴悽怵惕露濡霜零孤也可託
不負其兄嗟今之人皇皇於利簞豆動色何知仁義誓
日矢天背而携貳疇爲久要不渝其志以視封翁能無
生媿翁固豪爽雅慕清幽雖近市囂樂此泉邱何以名

盧元亮其疇春秋佳日吾息焉休編修歸來孝養是謀
載酒相過昔日羊求酣嬉話舊交錯觥籌翁年雖老大
白能浮何意去秋忽來凶問老成云亡邦人恐震矧於
編修至爲暱近回憶曩年能無惋懣者則斯潔酒惟清
醞侑以蕪詞來格無吝

祭陸檢討坡星文

嗚呼老成凋喪典型頓失疇追後學而示之律猶有不
亡功留著述六經表章炳如星日吁嗟經傳自昔難言
漢註唐疏聚訟滋繁徒究其委莫窺其原君抉其微照
彼昏昏其書一出罔有異論君官翰林圖書鑿奧作為
文章妥帖排冝心摹雅頌力追訓誥立言不朽輝煌朝
廟俯視群言鴉鳴蟬噪一麾出守仲子在粵君也薄遊
山川踰越蠻江湍激桂嶺雲截盡入奚囊詩思勃發
聖朝育士書院宏開秀峰主講咸謂君才君應不辭灌
漑栽培蒼松文梓盡顯名材為國樹人厥功以恢士也

有慕流連潮洄予昔壯時筆墨自喜愛者忘醜偶挂於
齒君來吾吳水木棲止不鄙而棄交懽密邇詩文辨質
莫逆於指時復過從迎門倒屣射獵之圖臂鷹挾矢五
齡所寫屬題誦諉或共聯吟風物閑美何意疇昔凶問
忽承君實師資豈曰良朋奪吾模範太息拊膺望風增
喟中夜頻興君傳經學載籍光芒長公明經文筆班揚
仲也治行媿古循良佇見九遷爲時棟梁繼君之志君
歿不忘白首論交君先捐館人壽幾何來日苦短老淚
揮殘於邑搦管君其有靈鑒此欸欸

祭孫定叔文

繫大雅之不作鮮六義而得正始競揚標於范陸輒搖
筆而自詡或浮夸而喜僻半蛇神而牛鬼惟吾友之肆
志獨特立而振起研精華於六經融百家而驅使師漢
京之樸厚掃六代之藻綺緬風騷而遠追託美人與香
芷蔚焉鳳鸞之摩霄竒如蛟龍之戲海逮斂華而沖澹
譬醇酒而彌旨蓋變化之無方恥隨俗而步履同學奉
爲圭臬視衆木之有模楷邈予夙昔之締交當康熙之
丙子偕張浣石顧公石與高遠澄馮來絨並望古而遐企陟洞庭
以渡湖凌高峰之雙峙復訪舊於金陵望焦山而檝弭

既橫經於臯廡欣二方之秉禮莫朔東華愛水木之深茂憩

亭館以至止聽池魚之跳波送鳥聲之悅耳有金蘊亭張

石帆之素心與周欽邵緱而接軌劉生東北遊而屢歸

沈郎方舟健筆而披靡予時風雨而聯床快細語之疊

疊咸一唱而君和見百篇之纏纏予薄遊於淮揚適招

要於御史念孤蹤之睽離剖尺書於雙鯉逮葑溪之卜

宅更石里之重徙遭先慈之奄棄辱慰問之無已悵暮

景之多端時引喻而相解數五十載之深交殆如君而

有幾惟勺湖與吾子庶真誠而肯綮何後先而賦鵬痛

知己之莫恃記握手於高齋實秋月之初朏謂後會之

未遠接笑言而可俟曾日月之幾何俯八極而蟻視幸

詩卷之長留固淵雅而有斐名譽曄其用光跡雖往而

奚悔覩承志之有子抱美才而雋偉跪陳辭而奠竿知

昭鑒之如在

祭汪峻堂文

雍正丙午君侍乃翁養疴吳門海湧之峰與予論詩溯
源國風厥後聞君外艱是丁心懷毒痛寢食靡寧雪漁
之廬改歲相見貽我以詩辭多雅鍊別去幾何三見秋
雁東樓訪我出逾江縣相與盤旋程生邦彥於後二年
君上燕京驪歌在路揖別吳城官亭之澣勸我橫經燈
昏雨暗花開鳥鳴試罷言旋局閉柴荆乙卯之秋重遊
京兆人爭羅致光華能葆掉首黃塵霜天白草乾隆改
元首籲英才爾有奇文房考稱佳仍然見別復感沉埋
遨遊齊魯匹馬歸來今年大比乃試浙水載書下榻西

在學堂書卷十一
湖之涖抱病暑風旅中誰倚誤爾聰明亂投藥餌郵程
二百一水如咫何不遄歸乃致不起天耶人耶終無信
理嗟嗟吾子學有師資發爲文筆今誰過之千波宗老
不廛貽詩亦有壇長丹霄是期大鵬之賦筆走蛟螭君
昔還鄉江船箭疾三百重灘崇崖萃律風濤喧飀林莽
叢鬱猿吟鴟嘯淒其風日成詩百篇聽者嗚咽老友激
齋屢屢稱說我憶往歲訪君書樓魚跳池水雪照羊裘
抽毫作賦綺合葩流謂予知己商確綢繆吳江東下信
宿恒留所未忘情鸞脰未遊嗟我之衰蒲柳是懼君方
盛年乃棄而去母爲爾悲族爲爾憐煢煢孤哀痛膺

墳所異首夏安仁涕漣塵凝長篔瑟斷朱絃曾不數旬
並赴窮泉雙棲連理豈其云然而我所悲平生是念哭
不撫棺歿不視斂盈盈帶水扁舟猶纜清宵有夢月出
灑灑猶疑君來對面祇暫遺文可傳合授雕槨後死之
責誰其堪任適庭與予何辭校勘古稱立言君亦何憾
哭泣寫哀庶其昭鑒

祭蘇州管糧通判周公文

士感知已道義是友而今所無惟古則有繫我識公絕
無依附醜蔑一言投分若素粵在疇曩見公金閨公即
過我論議激昂河梁言別公赴通州桃花春浪秋月黃
流公罹母憂不見三年聞公抱病走謁床前麻衣白帽
絮語纏綿意所難忘鉛槧未竟先公吟橐要予訂定侍
郎之文焚餘無幾浮圖一篇命識原委維昔侍郎持節
崎嶇金戈鐵馬殺賊剝屠功高物忌被逮遭誣從者千
人舉幡 帝都四泣有記因樹有圖樹則西曹泣乃在
塗次第請題捧卷悲吁鄙人蹇劣執筆躊躇抱疾幾何

忽焉徂謝疇昔之夜猶過寓舍鑿者在門公已怛化六十春秋今古何速霜斷哀鴻雪隕修竹我悲知已忍過公廬心焉摧剝言與淚俱

哭顧氏女文

年月日汝父使汝弟師稷志尹以清酒時果庶羞之奠祭於第二女顧氏小娘之靈嗚呼汝之死也年三十四嫁九年而病病四年而是不死於兩年之前而死於兩年之後耶汝於壬子五月痰凝驚悸成癇證時汝姑猶在堂實飲食左右汝冀可向愈而汝病益深漸不省人事後二年遭姑之喪猶藉兄伯之配張氏貞女同居慰藉汝汝三叔初娶婦婦新來不知汝張氏姒時歸母家汝夫壻又就館於城既失館不耐家居輒牽率往來舅氏光福山中室惟一老嫗婦當春夏交即歸隴畝耕種

汝與膝下六七齡幼女熒熒相對食飲亦不以時而汝死矣嗚呼哀哉汝之生也遭予困苦十歲而汝曾祖母大故十八而汝母病亡汝兩弟長者十二歲仲六歲汝祖母年踰六十汝與伯姊治中饋親縫紉視祖母寒燠撫兩弟既伯姊歸蔣氏家事皆汝助祖母整飭無有誤汝二十二而嫁汝姊於是年死後一年汝祖母奄棄病中迎汝歸襄喪事此後汝間一歲來省視我來不一兩旬即歸豈意六年前過我竟不能復至耶當雍正初勞山公以事落職多累賓客汝與祖母驚憂對予不言而時時露於色又會有訛言城中無識者多結束去鄉井

汝與姊尤驚恐後遂嬰大病療之愈汝外實而內虛當汝壬子年初病吾携醫就視醫用藥頗峻信之不篤他醫雜投藥劑久而神氣日虛汝亦倦服藥蹉跎歲月遂成痼疾嗚呼是誰之過耶汝病中屢欲歸緣汝心疾又必由舟以達益未便故不即迎汝今年首春吾至埭川汝又病三日瘧三月十五日再至汝瘧益厲形衰貌瘠幾不可識日夕叫號不止七月初九日汝夫壻自城歸汝偃臥榻上蓋瘧半年矣猶苦醫藥也是夕黃昏後聞五房從弟室張氏訃汝矍然驚起曰張氏姊竟逝耶至漏五鼓汝疾遂革矣此又何意耶張氏病在汝前亦四

五載恒歸母家醫藥以是感於中耶抑醫藥者亦不起
悟此中莫不有數耶汝性柔順而溫厚似可永年乃遭
此奇疾又短命以死此不可知也汝死之日傾箱篋無
一錢衣飾在質庫者率斷絕幾無衣以斂嗚呼哀哉汝
事舅翁六年姑媪九年舅年七十咯血汝侍左右
姑持家儉勤汝克佐之聞汝姑常語人曰吾得仲子婦
乃勝於生女而門以內從伯叔娣姒無間言汝習勞苦
操井臼菲衣嗇食不欲人知然亦有知之者汝母在九
京汝可無愧矣汝嘗勸我出門營買山之資乃竟不可
往吾今年垂六十多病家又多累兒女中知我心者惟

汝一人汝又命不永且無兒子免三女喪其二我能無
痛耶昌黎氏有云汝目汝面在我眼傍汝心汝意宛宛
可忘猶之予之悲汝也汝仲弟未婚繼母所出季弟尚
幼追憶汝失母撫兩弟時不禁悲來填膺老淚泫泫不
能盡也嗚呼哀哉

祭王孺人文

邵編修北厓德配

吾友編修歷有歲年質疑經義賡唱詩篇編修過吾吾
 亦頻往時挽而止具黍相餉有肴斯潔有酒斯清盤餐
 肅陳間以和羹乃知編修室有賢婦既嚴中饋亦操井
 臼家故儒族厥氏惟王歸我編修于于相莊致孝於姑
 克稱色養姆姒相見温温德讓編修登第孺人來都編
 修典試孺人回蘇顧語編修我姑已老君尚歸省睠言
 烏鳥承歡一日不易三公寧需祿養菽水融融編修復
 命入告請假綵服持觴起拜堂下三徑就理羊裘來
 頻剪蔬治醴洽我嘉賓姑衰善病久臥牀第孺人祇事

竟夕危侍疾痛苛癢扶持抑搔非無嫗媪躬執其勞
世宗御極 覃恩廣被榮誥輝煌綸翟用賁媼親燕賀
珠履犀鞶尤徵謙抑跋踏靡安吾聞壺教首重順德詩
詠無非禮嚴內則絲麻布帛修髓脂膏已富能儉雖貴
勿驕云何末俗專恣成習詬諍反脣良可嗚嗚惟彼孺
人實爲禮宗閨門之內肅肅雍雍孺人之歿編修淒惻
哀子拊膺老姑淚臆吾言編修走弔其喪敬摭蕪辭以
奠一觴

陳樹滋哀辭

并序

樹滋諱培脉長洲之甫里人以孝友聞於家以文章著
於當世今年六十一竟以困窮死予聞而哀之樹滋嘗
試京兆又嘗之秦隴山東東粵賓幕最後客山西學使
所所至皆傾其賢豪在西安時與王徵君山史李高士
雪木討論經史及勝國啓禎時事頗悉山東則尤與新
城王尚書論詩有契其詩文必根柢深蓋淵源有自
矣予與樹滋交三十年往予客淮南不見樹滋者久暨
家葑水而樹滋適從肇慶歸遷居郡城數與辨論詩文
流別難答紛綸勉予以所不及旣而家城北予又遷徙

無定蹤跡少疎去年遇之婁門方欲求新城所輯山木
集與予商刻而樹滋死矣屈指素交若宋成業嘉榆顧
紹敏嗣宗徐夔龍友諸子皆後先傷逝今樹滋復窮困
以死方易簣一子尚幼貧不能斂李撫軍鹿山爲治其
喪其可哀也已遂爲辭以哀之其辭曰

學績兮才良早奔走於四方登泰山而下掃粃糠兮弔
往古於咸陽胸懷磊落兮激爲文章日星明潔兮湖海
汪洋何六十而不遇兮齎恨茫茫鳶鷂高飛兮威鳳迺
戕彼豐此嗇兮抑又何常生雖不得志兮死乃彌光自
古皆有死兮惟吾友之堪傷無一畝之宮兮三日之糧

顧孺子之未立兮覩手澤以悽愴幸夜臺其有故人兮
話舊而蒼涼矧予交之既久兮悲悒悒其難忘

方勺湖哀辭 并序

予與方子交三十一年矣終始如一日方子籍本廣東之番禺父九谷先生以名進士令江寧郟城二縣為政有惠愛後居於蘇嘗著書深探性命之理方子與其兄莫朔承其先志而好學踰其兄沉酣古籍專力盡思涵養於中者久為文質而贍約而明引喻託物氣厚色飛以追古之作者方子兩返嶺南一遊京師覩波瀾之險崖谷之奇皇都宮闕之壯麗與其平居所處之境沖和逸樂得喪離合必發之於文雖酬酢紛如而其心時往來於此也先是歲甲申粵人潘植斯立時時稱說方子

在學齋集卷十一
三
不去口始相識方子居近臯廡有屋一區饒水石不數日必見見則出其所作論工拙各問難所讀書相與撫喬木臨池亭鳴琴酌酒談諧甚適未嘗不漏下燭跋而止後子客淮揚有年屢徙宅喪妻又遭母喪兒女婚嫁憂愁困頓力疲意耗不得常過從而方子亦哭其兄又連哭其五子太夫人亦奄棄十年間疊傷哀戚喪服不離於身傾其產嗚呼方子可謂窮矣方子為人器識溫茂訥於語言相知久則愈可敬母夫人九十一而終方子年踰五旬居喪盡禮事其兄家財無爾我急人患難家日落不以有無易其志蓋今人中古人也今雍正十

二年八月以疾卒年甫六十臨絕之前夕數數呼一二老友及予而不能言顧家人穉孫在前終不及其私嗟乎方子之高行將必有當世作者爲之立傳區區之懷不能自已乃爲哀辭以舒我哀其辭曰

嗟方子兮時之偉器安貞蘊德兮出入仁義苦志積學兮力掃叢翳蓄養既厚兮發之乃粹日星川嶽兮其文炳蔚玄元橐籥兮鼓之以氣歡能使解頤兮悲爲隕涕名譽不期兮而乃日至奄忽徂逝兮傳者有在故鄉南海兮迢迢嶺外蝮蛇猛獸兮橫縱恣肆炎風瘴霧兮毒厲爲害魂兮歸來兮毋爲久滯嗟方子兮能禁揮淚

前光祿大夫戶部右侍郎管理蘇州織造李公行
狀

康熙六十一年勞山李公虧織造庫帑金四十五萬兩
上奏

聖祖皇帝請以逐年完補

今上即位清查所在錢糧覆核無異 溫旨赦其罪令
罷官以家產抵十五萬兩又兩淮鹽商代完庫三十餘
萬兩蓋公視鹺時有德於商人也帑金以清雍正五年
以他事發遣口外七年病卒公之子鼎聞之哭失聲不
敢乞言於顯者果客公久懼公懿美弗聞謹為之狀公

姓李氏諱煦字旭東又字萊蒿一字竹村先世山東萊州府昌邑縣人本姓姜氏祖諱某父毅可公諱士楨順治初貢生 廷對用文吏筮仕歷官廣東巡撫都察院左都御史蔚州魏敏果公奏天下清廉官七人巡撫公與焉公其長子也年十四侍巡撫公河南臬司治所聖祖皇帝元年恭遇 覃恩公以蔭應授內閣中書在都候選歲甲寅授中書舍人巡撫公遷福建布政使時耿精忠肆逆制府李文襄公屯師衢州以扼賊衝聞巡撫公才略疏請留佐軍幕未幾調浙江布政使而廣東尚逆與八閩連兵欲爲亂巡撫金公某薦公以原官效

力行間久歷軍事授韶州府在任四年多惠政後巡撫公自江西調任廣東公改補浙江寧波府至則抑悍兵鋤豪猾弭盜賊培學校綏養黎元俗漸以淳有漢循吏之風郡人立生祠圖其像丙寅 召入內務府衛直禁陞扈從出入積節不懈而辦事敏幹

聖祖察其忠純歲壬申 命視蘇州織造既至釐剔積弊澄汰浮費匠不擾民官不累匠往時部員在任嘗睥睨督撫奴隸州縣縱恣驕矜寮吏因是多不法公以道持躬以法馭下吏皆肅清春秋佳日與吳中賢士大夫飲射賦詩爲樂三吳以爲盛事

聖祖念兩淮鹽課甲天下須廉幹風力之臣整飭之而
臺負歲一更使不獲盡職 特命公與江寧織造曹公
寅兼監察御史董其事令遞相踐更期以十年為考績
公自乙酉至癸巳五視鹽政悉心籌畫所條奏以若干
計其大者如丁亥年奏陳商困蒙 恩將淮商借帑百
萬兩概行蠲免又與曹公奏請於五年內每歲以羨金
代商捐補二十三萬兩復以鹽場價重各郡積滯轉輸
為難請緩運引以紓商力又以口岸壅塞私鹽充斥請
將淮揚各營武弁悉隸鹽政衙門統轄定處分嚴例又
請於三江口立江防鹽政同知專司譏察又與曹公請

寬奏銷考核期限均於復 命時舉行並乞湖南七郡

鹽價一例通銷其所剴切敷陳動中機要康熙戊子

所屬頻值水旱公星軺按部賑南北三十場貧竈丁
十萬餘口及新增竈丁九十餘名捐俸金修儀徵縣學
宮調卹諸生疏濬河道淮揚之人交口頌公或垂涕洟
當壬辰綱例應曹公視鹺 命下而曹公卒公遵 旨
代理使事一無所私

天子知公之賢丙申丁酉綱 詔再留二年計七年之
內貢江寧蘇州織造錢糧一百四十三萬兩有奇停江
安藩司庫支給代商完欠一百十五萬兩奏免商人借

帑百萬兩國賦以充商力亦裕鹽政秩然先是乙酉歲
聖祖嘉念勞績拜公大理寺卿曹公亦授通政使司通
政使兼織造如故丁酉復晉戶部右侍郎洵異數也果
按鹽鐵官始自漢武元封中鬻鹽佐賦魏晉及唐制凡
幾更自劉晏爲鹽鐵使上鹽法輕重之宜官獲其利民
不知貴鹽緡遂居天下賦稅之半宮闈服御軍饗百官
俸祿皆取給焉前明設轉運使及提舉司課有額以監
察御史分察鹽課宣德中始令於淮提督軍衛巡捕私
鹽後歲一差駐節揚州我 國家鑒前明之失盡去常
股存積飛輓諸名而歸之綱食一切引課盡輸天府法

既詳盡而兩淮鹽法天下視爲準則公以密勿近臣經
畫規置惜商惠民雖第五琦劉晏何多讓焉已卯春
聖祖行省方之典奉

皇太后南巡癸未

聖祖臨閱河工乙酉丁亥兩年巡幸如前凡四遇 翠
華南幸車輿服御 行宮帳殿大官尚食應織造供頓
公竭誠致慎次第得宜未嘗毫末擾民其侍直 行在
當獨對時凡吏治民生必據實以奏多所裨益平居留
心民瘼東南水旱凶災輒上聞當康熙四十七年歲大
歉奉 旨平糶公減價濟民所費萬計全活甚衆薦達

能吏如鹽運使司李公陳常張公應詔皆至大官負一時重望而保全善類罹文網獲矜全者亦不少公性孝友內行淳備其候選中書在都也王母高太夫人尚在堂年老公事之甚謹爲內務府時巡撫公方里居公休沐日與韓夫人謹問起居烝烝色養乙亥歲聞訃奔喪以不得親殯斂痛不欲生母王太夫人卒哀慟過甚生母文太夫人命四弟留養京邸後奉迎南來盡心侍奉年至九十三而卒孺慕之愛不少替巡撫公廉潔以薄產授諸子公悉讓之諸弟同懷弟兄五人官江南時諸弟南來省視必謹視寒燠留三四月爲製衣裘厚以資

之苦家累者授之宅未婚娶者佐之費撫諸姪恩意備至振其乏困資其膏火姪某夫婦早世遺孤方穉公尤加憐恤飲食教誨之如孫周氏女甥內姪韓以培其嫁與娶費皆出於公人戴公惠而公終身無德色爲政持大體貌渾厚而內精明揣摩天下事不失毫髮好藏書積幾萬卷間落筆爲詩文泠泠有爽氣字有米友仁意而尤愛馬江亭坦腹命圉人牽至相視或忘日夕其高懷蓋如此公初以中書 覃恩 敕授 次以 恩授大理寺卿加六級仍管蘇州織造再進光祿大夫祖考贈如其官夫人 誥封一品夫人祖妣妣亦如之

公生於順治乙未年正月二十九日卒於雍正己酉年
二月某日春秋七十有五娶韓氏昌邑庠生晉卿公女
持躬端重有材德當

聖祖南巡時 行宮之內公所未及計算者夫人輒能
指辦以命婦朝謁

皇太后應對得體

皇太后以夫人漢人女曉習規矩為難子二人鼎鼎女
一人黃阿琳其婿也正黃旗叅領兼佐領為內務府營
造司郎中佛公寶之子公卒之日囊無一錢韓夫人已
先數年卒二子又遠隔京師親識無一人在側方嬰事

時下於理刑部擬重罪

天子念其前勞 特恩從寬發遣方行牛車出關霜風
白草黑龍之江彌望幾千里兩年來僅與傭工二人相
依為命敝衣破帽恒終日不得食惟誦

聖天子不殺之恩安之怡然嗚呼公始終忠誠之概可
以見矣初公與曹公更代視鹽也曹公病公問疾彌留
之際曹公張目以鹽政及校刊 佩文韻府書局事屬
公公諾之又念曹公兩世官織造奏請其子顥襲任不
二年而顥即世公復保奏顥從弟頰復任織造事不以
生死易交其所隸烏林大筆帖式或升遷或身歿而負

庫銀者皆為代納故交子弟單門寒畯待以舉火者更數十百家貧者給絮疋死而不能斂者助埋殯常祿所入隨手散盡官織造三十年時以千金贈人而卒以虧損國帑身挂吏議賴

天子聖明曲賜矜全然終貧困以死而公終無纖毫芥蒂於昔之被德者也嗚呼可不謂賢哉果曾依公幕府受知頗深聞公之逝痛悼久之惟以素所服習於公暨公所述韓夫人行略中語排纘如右而不敢有一言之溢但使公之行事不泯沒於當世而後之欲知公為人者可考信不誣焉謹狀

在亭叢彙卷十二

長洲李 果 碩夫

家傳 有序

彭定求填諱

吾家李氏相傳為帝顓頊之後臯陶為理官子孫以官為氏遂以理為姓後改為李歷世久遠先世自秦隴分支居中州豫章楚蜀代有聞人明中葉有遊學來江南者後居蘇州之常熟縣既而居郡城崇禎末寇亂王父取先世家集並譜牒捆載去鄉書多難舉裂譜系一卷納襪被中又避兵至崑山倉黃復失世父省庵府君欲葺一書未成而卒故老有言予先世為唐西平忠武王

諱晟之後然世遠不可知舊唐書載李義甫既貴自言
出趙郡與諸李序昭穆而無藉者倚其權勢拜伏爲兄
叔者甚衆宰相李揆山東甲族見李輔國執子弟禮謂
之五父凡此類又皆詳書以志其非子家寒替不敢仰
附高望謹按古人述祖德之意爲家傳

五世祖龍泉府君家傳

府君諱培源字龍泉家於常熟以力田讀書爲業不求
仕進家故稍裕數以周鄉里明正德嘉靖間舉富戶府
君乃遷郡城東之干將里鍵戶讀書非其人不友聚書
數千卷而教子以學曰此吾貲也嘗著述祖德賦爲人

孝謹和易澹然自足有陳太邱之風鄉之長老教其子
弟必以府君爲法曰孝友恭謹如李太公足矣子潤澤

高祖少園府君家傳

府君諱潤澤字少園凝重明敏精尚書學築別業於城
東濠股之上門傍清溪後藝菜圃竹木茂密延宿儒課
子其中嘗舉宋人之言曰士而貧多於工商而富也龍
泉府君卒居喪哀不踰禮後家落或勸之謀利輒不應
胸襟浩落處之晏如有古賢之風子人傑

曾祖之白府君家傳

府君諱人傑字之白少穎異攻苦力學治六經有疑義

輒對案廢食既後與楊公廷楷李公模彭公行先劉公
能補吳縣學生庠姓張試輒高等群推為諸生祭酒而不
得志於有司家日以困明萬歷之季年士之為制藝者
喜倡新說叛違傳註府君慨然思振其弊講說辨難與
同志明先正之學受經稱弟子著錄者頗多府君浮沉
鄉校中晚年學益精進而窮益甚乃作為歌詩古文以
道其所自得簞瓢屢空凝塵蔽榻泊如也為人和易鄰
有潘某肆非禮以犯府君聽之未嘗與較時稱為長者
配張孺人貢生太液公諱文彥之女崇禎七年卒年五
十有七有東橋集二卷子壽祥聖祥壽祥早卒無子

先祖懷遠府君家傳

府君諱聖祥字子厚

一字西美

少卓犖有大志讀書不專事

章句為文援筆立成而才勇善射尤好戚南塘將略嘗
曰丈夫當立功萬里外取封侯印即不遇閉戶著書亦
足以自豪矣 本朝受命府君時年二十五顧謂同學

王君發祥曰 國家疆域初定畿輔近地及汾晉齊魯
之間猶有竊發屢朝廷指麾夫天下承平重文開創重
武亦各以時安能復咿唔守章句哉仗劍謁江蘇巡撫
軍門為儲將尋歸補長洲縣學武生歲戊子省試與王
君同舉於鄉明年會試登進士 殿試卷上 欽定名

第二 賜武進士及第謁選浙江杭州遊擊授懷遠將軍部下士雲屯森立才勇者爭至府君勤訓練嚴賞罰士卒無敢踰法當是時浙東海氛未靖 王師扼之定海縣之舟山府君在行屢著勞績提督田公忌之以其功移他人府君既與督府意齟齬又病作乃歎曰吾即久居此將安所見功乎乃罷歸田公者名雄故明靖南侯黃得功家將也降 本朝封不義侯一日旌幢輿從登杭州城闕城髣髴見得功惶遽失措墮地破其膝病人面瘡死府君既歸賃屋居齊女門外日擁書一編奉曾王母張孺人孺人性嚴偶不懌府君與葉淑人必長

跪請命奉卮酒上壽顏霽乃起居林下者九年卒年四十五兩子長世父長春次先考府君長身驍勇幼困頓而喜任俠遇事侃侃能盡力不肯附和諸少年多借其名以行識者比於季心又好為人論古今興廢事口手指說聽者頗解嘗於演武廳角藝舉六百斤石柱又於關壯繆廟舞大刀刀重百六十斤張叟亮采曾見之向果稱說也方會試歸江南獨身行李暴客數人躡其後府君仰視雲中飛鷹控弦躍馬一發墜地數人者驚顧引去府君未遇時產止薄田數十畝既歷官而產日落身後不免貧窶王君者官江寧守備隱斜塘之東果嘗

遊其門爲果道府君遺事甚備昔李將軍廣才氣無雙而漢文帝歎其不遇曰假令生高帝時萬戶侯豈足道哉府君本儒生以材武遭逢 聖主掇上第矣遇主將非其人抑鬱以歸遂捐賓客寧不悲夫

祖妣葉淑人家傳

淑人姓葉氏祖汝華明隆慶庚午舉人滕縣教諭父有震貢生崇禎甲申國變淑人年十四隨父避地太倉之沙溪有震公殉節死仲兄慎行兵至不從被斫創十三越十三日死淑人年十七歸王父事曾王母張孺人恒雞鳴起嚴妝趨侍張孺人曰婦知禮矣王父好讀書擊

劍習弓馬刀槊及計偕入都家事皆淑人理王父成進士歷官浙中淑人相內治時椎牛置酒以鼓士氣王父出兵舟山與提督不合罷官歸年未四十酒酣耳熱時拊髀而歎淑人輒慰解曰老屋數椽薄田幾十畝種黍藝蔬以奉老母足矣王父歸里後始生世父又八年先府君生後一年王父捐賓客淑人時年三十曾王母猶在堂淑人慟欲絕顧世父與先府君幼弱歎曰李氏一綫此兩孤耳明年曾王母歿張氏從昆及祖姑盡括室中所有而去不足又畀以屋與婢又外侮蠶起親黨二人相表裏僞爲券索逋淑人棄其遺產及鼎彝雜故

物償之無怨言世父與先府君受經淑人篝燈相對中夜作羹粥節其勞於先府君尤鍾愛嘗曰仲子能承吾志也世父客江右歸與鄰人訟家益落恒抑鬱不自得淑人曰嘻兒何見之小也天道福善禍淫消長之機循環不息以爾父之才不能大用而竟中折此殆有天也昔戚黨之破我家者謂可自飽未及三十年亦同歸於盡矣男兒宜安義命毋以是戚戚也淑人性慷慨持大體急難親舊未嘗計已有無范氏表姑與夫反目去爲尼淑人與王父勸勉之爲夫婦如故視沙溪諸兄子誼尤周至奉高曾以下烝嘗數十年誠恪不少懈又以針

指貲買山營葬曾王父母及王父兩世棺平生莊靜言動不苟聞鄰媪嬉笑聲則曰婦子嘻嘻失家教也晚歲奉佛一月中茹素者殆半淑人少歷滄桑中遘家難焦勞盡瘁自府君即世中懷悲愴居常鬱鬱歲間至沙溪祖舅家後以渡陽城湖被寒至沙溪病下痢遂不起年八十二初果四歲隨淑人寢食入塾歸侵曉寤即令枕上背誦四子書成誦乃喜嘗隨至沙溪見祖舅葉氏村莊魚塘竹林木棉作花盈隴田塍如畫淑人與祖舅談勝國舊事而甘露李氏祖姨母年八十餘亦至相盤桓祖舅每歲遺瓜果海魚及木棉花屈指在目今果年亦

六十有負遺訓言之為愧為序梗概如右以見淑人為
吾門中流砥柱非淑人不能至今日也

世父省庵府君家傳

府君諱長春字東徠晚號省庵王父懷遠府君長子也
生九歲而王父即世府君少磊落不羈恥標飾為名而
苦志於學彊記博聞下筆有奇氣家貧棄其田宅嚴冬
裋褐不完市中人竊笑之府君浩歌不輟也康熙乙丑
入粵道江右歙人江鳴贊延之饒州越一年館李君文
煥所寓南昌南昌名士萬任傅修羅牧諸君皆與府君
游又二年還里又二年偕先府君遷城東郭婁江之上

既又遷居城中其明年先府君奄棄府君念王母年老
乃授經以餬口蓋歷二十五年中間復遊京師及河南
之裕州者二載暇則肆力於文窮源深思頃刻數百言
未嘗起草垂老讀書不少止年六十一遭王母之喪又
屢徙宅兩子不克自立而皆遠出服賈府君憤悶病右
手巨指腫撫膺呼曰柎楨何時歸乎吾弟之子其長貧
賤乎顧世母及季弟悲不已毒未潰遂卒卒年六十四
府君性伉直喜結客為豪舉常衣食之至有為婚娶者
急人患難不自顧計論天下事則袞袞不倦初王父歸
田日有麾下材官周某某年老無依隨至蘇府君方幼與

之講習弓馬技擊客皆稱其能當丙辰歲府君年二十
五聞閩中亂內院某公帥兵入閩慨然自許欲為朝廷
馳驅疆場乃度仙霞嶺思赴軍前隨征以取功名不可
得卒迺遭抑塞窮經以老世無知者有自怡集四卷果
十二歲而孤隨府君肄業每出必携之徧見諸前輩嘗
語果曰世澤岌岌欲墜承先業者汝矣太息久之世母
鄧諸生三顧女賢而能文事王母孝不二載旋歿繼娶
湖東徐氏府君歿二年丁酉世母終明年從弟楨卒卒
之後二十日季弟梁又病卒嗚呼楨旣逝而梁又不祿
今祇栻一人栻一子庭年二十餘又卒噫可哀也果不

才不能承府君期勉之志今髮白種種矣而從弟栻窮
老無子天道未可知此果采掇舊事而不勝欷歔悲感
也

先考蟠莊府君行述

尤珍填諱

嗚呼不肖孤果年甫十二而喪我府君賴吾母徐孺人
守貞自誓王母葉淑人以撫以教以迄於今二十有八
年生無一日之養歿又窀穸之不時惟歲月之久以陷
於春秋之議旦夕哀號無以自容人世其敢輕以不肖
之辭述我府君顧惟府君東躬砥行孝友聞修重以孤
之不肖弗克發明幽潛之光負罪滋甚謹就王母葉淑
人吾母徐孺人所告語及聞之世父省庵府君者輒含
哀茹痛忍淚濡毫略為撰次如左

府君姓李氏諱長根字仙蟠一字蟠莊先世秦中代以

耕讀爲業有居河南武陟江西吉水及楚蜀者傳爲唐西平忠武王諱晟之後譜牒失傳殆不可考勝國中葉始來江南屢遷而居郡城五世祖龍泉府君諱培源高祖少園府君諱潤澤皆有文行隱德弗耀曾祖之白府君諱人傑吳縣學生讀書纂言著有東橋集生二子長伯祖子愷府君諱壽祥次西美府君諱聖祥即先王父也

國朝順治戊子科武舉人已丑成進士 殿試第二人及第官浙江杭州提標右營遊擊階懷遠將軍出兵舟山樹有勞績生二子長世父省庵府君諱長春次府君

府君生一歲而孤又少多病及長從雪觀蔡先生德烈受業刻苦力學事王母葉淑人凡淑人所須輒先意承之家故貧又多外侮高曾世守之遺僅藏書千餘卷薄田數十畝而已世父又析產以居恒客外葉淑人惟府君是依後娶吾母徐孺人辛苦操作一室蕭然中常自得也當世父去閩中值逆藩耿精忠亂後戎馬載道音問不通者五年葉淑人以爲憂府君方弱冠私揣知淑人意於歲杪衝寒子身攜襪被涉難河度仙霞嶺備歷危苦始見世父於福寧州偕以歸方踰嶺府君冷泄數日世父亦病腹痧臥不起瀕於死者屢矣卒遇療得全

既歸而世父困頓府君自以屋宅器用讓與世父爨既分而復合歲已巳世父棄干將里故居乃同遷婁郊之官瀆鄉府君奉葉淑人以隱課不肖經營取漢儒註疏程朱義解探索講授折中以聖人之意務以悟入又謂儒者之學涵養在敬凡百紛華靡麗屏弗使寓目又揭昔賢靜以修身儉以養德二語書之座隅日吟嘯竹林中時陳高士匡國爲王父同研友以前明諸生隱於東村常熟馮丈行貞崑山顧丈某亦流寓於此時過草堂討論文藝有素心之樂後一年復與世父遷城中旋授經於鄉之王氏忽病嘔血卒於館舍嗚呼痛哉府君潛

心厲志專務實踐雅不欲以文辭炫長取名譽削橐輒棄之口不暴人過失終身無宿怨親舊往來接以恩誼戚黨有某氏者向頗藉先王父力既後家業累巨萬府君未嘗以家累望援嗚呼素履可以觀矣府君生於順治十六年己亥閏三月二十六日卒於康熙二十九年庚午九月二十四日享年三十有二配吾母徐孺人處士仲美公諱從學女子男三長不肖果次棟次模棟模俱殤果娶陸氏孫男二師稷志尹孫女二不肖果弗慮弗圖偷延視息今始卜地吳縣五峰山博士塢棗園之阡將以今康熙五十七年二月 日奉我府君之柩

葬焉不肖荒迷不文不能狀先德之萬一謹綴所見聞以聞於當世立言君子採擇賜之文筆闡揚俾得奉以藏諸邱窆而揭諸原無使德闇而弗彰不肖孤死且不朽不肖孤果泣血述

先妣徐孺人事述

先孺人姓徐氏浙西秀水名族家於吳外祖父仲美公諱從學茂才力學母張氏先孺人行二年十七歸府君少府君一歲府君讀書常廢寢食先孺人未嘗敢先時祖妣葉淑人方嚴持家動以禮法家衆咸憚之惟先孺人能得其懽心偕府君潔滌灑盡子職無怠府君訪世父省庵府君於閩中先孺人侍祖妣於家晨昏無有關失世父自閩歸益困不支府君盡以前所析產推予世父先孺人能承府君志娣姒無間言後府君鄉居與先孺人擷園蔬習溪魚務竭奉養之誠府君有五六老友

在亭書卷五
時往還先孺人置酒治肴核必謹後世父偕府君移居
城中府君仍教授於鄉一夕病卒年三十有二蓋康熙
庚午年九月也先孺人慟幾絕時不肖年十二次棟四
歲次模生未兩月先孺人痛不欲生念祖妣齒已邁不
肖輩幼穉乃強食飲然自是雖生之年無非愁苦之日
矣歲壬申不肖年十四先孺人爲求婦陸氏癸酉孤棟
殤乙亥孤模又病殤先孺人傷感甚幾致疾自府君歿
後五年家益蕭條向時婢僕俱已散去先孺人躬自操
作不肖傭書官舍又十年而世父命不肖分爨不肖始
謝傭書之役又四年不肖典一椽與世父分居是歲祔

於水不肖又遘疾患無以奉甘脆嘗快悒不自得先孺
人輒語不肖曰第慮汝學未成爲我大感寧罪汝不足
於養乎澹泊吾所甘也不肖感泣謹誌之歲壬辰不肖
館於江都秋八月祖妣去沙溪尋歿於祖舅氏之居時
祖妣年八十二矣先孺人去沙溪佐世父世母治喪事
審視棺斂不使一有遺憾其年冬不肖舉祖妣柩合葬
黃山祖墓戊戌二月營葬府君於五峰山棗園新阡先
孺人曰吾今心始安耳庚子冬不肖婦病卒先孺人以
暮年再理家政撫兩孫爲兩女孫遣嫁屏當搢持心力
盡億卒以積勞之故成痼疾嗚呼痛哉先孺人素耿

在亭叢書卷三
介終身不苟言笑自奉極約性篤孝敦睦嫻之誼當癸酉六月祖妣病先孺人侍醫藥苛癢抑搔轉側便污皆賴焉兩浹月不寢終無倦容其與世母共居也事無大小輒身任之不以相委外祖父無子晚歲恒迎養於家二三從兄弟皆厯友于之愛沙溪葉氏諸中表為祖妣黨以事來不肖家或累年月久而能敬王氏姪女孀居時為存問兩孫讀書皆延名師宿儒膳飲必親自檢視凡先孺人明禮達義類如此居恒動止有法每四方名流及里中同學辱與不肖交者咸造廬執子姪禮拜堂下先孺人色莊氣和携杖敬謝曰諸公以道義砥礪吾

兒幸甚已又詔不肖曰某某賢汝宜師某某才汝宜友不肖受命不敢失禮於諸君諸君亦心折先孺人之賢曰是能以義方教子者也先孺人守節三十五年優游頤養者不及十載餘皆憂思困阨之日又喪葬婚嫁遷徙諸大事營心容顏尪羸手爪盡裂歲乙巳十一月晦痰喘頓作漸致脾泄食飲大減逮十二月初九日醫藥罔效泄瀉不止於十五日疾革語不及他惟勗不肖保身勵行命兩孫讀書而已嗚呼痛哉先孺人生於順治十七年十月十六日卒於雍正三年十二月十五日享年六十有六子三人長不肖果娶陸氏次棟次模皆殤

孫男二人師稷志尹孫女二人長適蔣立機次適顧浩
不肖苦塊餘生神昏志亂於先孺人孝節懿行挂一漏
萬惟望大人先生哀憫賜之誄傳銘表不肖死且不朽
亦感且不朽孤哀子果泣血稽顙述

亡妻陸孺人事略

孺人姓陸氏父紫明諱時貴母張氏紫明公恭謹拙於
治生與予家為世戚於先府君稱中表兄弟其祖庶母
河南范氏常來予家與祖妣葉淑人善孺人幼而端重
舉止有節康熙三十年吳中訛傳採選民間淑女閭里
驚皇世父省庵府君勸吾母締姻以一肩輿迎歸孺人
年十五長予一歲後六年始成婚當孺人于歸拜祖妣
葉淑人吾母徐孺人及世父世母於堂上每晨起問寢
有常候葉淑人顧語吾母曰孫婦賢能吾與若老懷可
慰已予家自懷遠府君捐賓客以來內難外侮洊至故

業罕有存者予與世父同居爨家計益窘乃傭書以養
吾母孺人襄治家事親操井臼數年之中奩橐為罄未
聞有交謫聲孺人嘗夜分絡緯治女紅予擁書相對或
謂孺人何太自苦孺人曰吾夫子績學礪行類非長貧
賤者吾是以安之也歲癸未丙戌兩從弟俱娶婦甲申
世父命予析爨丁亥世父遷斜塘之鳳里邨予乃典宅
別居踰年而世父貸他人金牽於訟不能償孺人勸予
代償之歲壬辰至甲午予客江都家食粗給孺人持以
儉約奉吾母甘旨外無銖釐妄費吾母以予奔走於外
也戚於懷而口不言孺人心識之輒多方為解吾母嘗

手書示予曰汝頻年客遊不得在吾左右吾垂老而鬢
髮未蒼正賴汝婦之能事我耳歲己丑生長兒師稷乙
未生次兒志尹皆躬自乳哺丁酉予買宅葑溪之紅橋
孺人助予種竹疊石羅經史增構房舍吾母偃憩其中
幾忘予之客於外也戊戌春葬府君五峰山為吾母營
壽壙己亥冬進吾母六十觴心念孺人此後可少逸奉
吾母優游晚景不意其遽病病而遽逝也哀哉先是庚
子七月孺人體患腫毒甫愈即病傷寒長兒師稷左脇
患流痰欲潰予亦抱疴累月孺人驚悸又腰左寒痰墳
起醫為砭治出痰血椀許創以漸平傷寒猶有餘氣十

一月望日病愈劇十七日而卒先卒之五六日孺人執手謂予曰吾病五閱月知不可爲矣身後無他恨惟老姑在堂奉養不終兩兒未克成立長女未嫁次女未締姻三事未了不能舍然又呼師稷志尹曰汝父少修志行兒曹毋失前業顧兩女曰我病沉滯不能待汝之嫁矣命也夫女子以敬慎爲主其志之諸戚來視疾者語皆井井有條理嗚呼可謂神明不亂者矣孺人生於康熙十七年五月二十五日歿於康熙五十九年十一月十七日得年四十有三子男二人即師稷志尹也女二人一許字蔣立機吳縣學生桂馨子一未字孺人少事

父母以孝聞後父母歿同懷兄二人亦物故嗣兄有年晚歲客揚州每來吳省視情意欸篤曰吾父母見背久見兄益思吾父母也敝衣糲食冬月恒以練裙納敗絮禦寒而色怡然予年三十餘謬以文辭見知前輩名公宿儒四方知名士來吳中者間相過從孺人治酒饌咄嗟具又飯客輿馬僕從馬芻次第如之其於歲時腰臘祠祀修事尤潔誠周人之急無兒女纖嗇之習故鄰里戚族多稱其賢孺人歸予二十九年食貧居約糟糠不厭更祖妣及世父世母喪徙宅者四佐世母爲從弟婚娶者二自孺人歿後家累萃予一身吾母暮年精力亦

在亭書彙卷三
為盡耗思昔孺人勞苦中梱佐予以養哀痛曷能自己
兒子師稷哭而跪請曰吾母懿媿弗聞小子懵懵何以
稱述因援筆記之如右不杖期李果技淚述

上宮保大中丞高公辭薦舉啓

竊以一邨一壑難將河嶽齊觀五畝五湖寧埒京都並
賦畦蔬作餉遑佐天厨瓦釜自鳴罕諧清廟山中樗櫟
虛蒙大匠之求轅下驪駒敢辱賢王之價何則尺有所
短易地弗能為良力有難勝吾斯未能自信也閣下壯
猷方召雄節范韓百粵八閩久資專制五溪六詔向藉
撫綏兼武緯而文經快風行而草偃今則

帝謀連帥重半壁於東南公自黔滇移三吳而節鉞周
以二南分陝曾總任於元公一人唐則宰相行邊爰開
府於雄藩千里經綸懋展黼黻光昭賢士願遊其門文

章莫大於是弘

天子作人之治用卜茹茅值斯文翊運之期勿遺葑菲
前承 敕旨科開博學宏辭續奉 恩綸詔舉山林遺
逸閣下虛公無滯飢渴有加亦既材擷鄧林早收嘉植
何難群空冀野詎尚留良而乃謬採虛聲招延下走夫
呂文穆愛士咸收夾袋之中謝宣城憐才無惜齒牙餘
論屬名流之題拂乍長聲華荷當路之薦樽濫叨品目
獎渥所及姓字為榮果豈不欲刮垢拭塵望司空而吐
氣躡蹄批耳向伯樂而嘶風也哉無如年力易摧才分
難強懼知己之或負捫素心而莫欺謹佈下情有妨寵

命伏念果少而孤露長乃蹇窮行誼未修於家庭文采
不先於儕輩董帷匡壁謝素業於承蜩鄴架曹倉恨前
身其非蠹貧乏著書之力耳目有窮賤營謀食之艱心
精易殫一知半解識鮮宏通三賦十年性成鈍拙聊東
塗而西抹效來鄰女顰眉終北轍而南轅益去古人門
戶蹉跎壯歲黽勉謏聞問生平所讀何書妄冀嚴朱之
上第顧此日願言思奮倍逾終賈之英年方今

聖世右文茂才應選魁奇碩望淹洽通儒傾三峽於詞
源颺飛泉湧搖五嶽於筆陣劒拔弩張朝賦暮詩立之
則見推韓愈登龍倚馬太白則自謁荊州凡名鄒而延

枚俱凌顏而鑠謝文成义手辭出鏤金於以鼓吹休明
羽儀隆盛彬彬郁郁雅雅魚魚家號淵雲渾同宿構人
矜潘陸轉患多才而果以樸藪之胸衰遲之腕思與連
鑣並轡鬪捷角強譬猶假鉛刀以割牲不缺則折策駑
乘而下坂有却靡前人寧苦不自知才固必由天授揣
之已審無俟更籌又况果比歲以來望秋早僊頭目眩
暈顏貌凋枯認杜甫於山頭祇存瘦骨老馮唐於牖下
獨抱殘經相本酸寒詎是鳴珂貴侶心憐瘡瘵難趨待
漏清班此尤果之所感遇披丹撫懷欲白者也伏乞閣
下察果自量之素矜果由中之誠另選高賢收還前命

俾得棲山飲谷拾橡採薪行矣此生纍焉自力不特庇
明公之德宇開臆攄胸抑長爲 昭代之幸民含哺鼓
腹聽鄰春而和相或不廢勞者之歌託擊壤以興謠差
自比封人之列矣

天平山補築白雲亭徵詩啓

萬笏攢峰詎數鄭公世德一龕遺額猶傳白傅清吟維
勝地之鍾祥實昔賢所栖止亘綿龍氣秀甲郡中突兀
翬飛翼乎山麓不有作者誰復舊觀前知大同府范使
君夙養恬機群欽偉抱器堪華國才本亢宗爲文正之
裔孫迢然名德分天平之支幹展也達人恢廓洵有家
風憂樂敢忘先訓稟承琬琰特達珪璋阮仲容肯遽入
官一麾出守謝康樂頗饒濟勝五馬遺榮潛見適因乎
時貴高情之自我纘服聿追來孝覺至性之過人宛彼
雲泉傍茲邱隴香林藹藹散花雨於諸天石碣離離儼

在唐書卷三
三
神靈於列祖千年功德之院四世斧堂之封陟降匪遙
魂魄應戀過之必式疇無望古之思廬此何年爰切永
言之慕有懷常寄靡墜不興此白雲亭之所由補築也
於是藉幽討而脫身欣看歸岫每顧名而思義悵望在
天陶令蕭閒不少思親佳句狄公貽贈奚煩妙繪新圖
遐契一生卷舒合度憑欄肆眺虧蔽多姿體勢鬱乎岡
巒清暉媚夫昏旦渺滄波兮不極賦筆會心圍紅樹以
蒼茫秋霜惕念景光坐愛盼蠻時聞不日幸落其成溯
典允從其朔松楸繫愾旣善繼述於後人水木均情因
思導揚乎同志伏冀東都上客南國詞宗結想榛苓好

續美人之什瞻言矢棘載賡君子之寧按古蹟於三吳
雅附青邱而有作師流風乎百世指歸東氏之補亡倘
來遊而來歌共以觴而以詠

跋趙飲谷輓劉東郊詩

琴摧綠水歎起絕絃笛愴斜陽情深思舊數南村之晨
夕久共素心盼北道之音塵遽傳凶耗爰披哀輓之什
彌增故舊之悲所恨文人多妨福命得爲才鬼良勝頑
仙撰有道之碑信臨文之無媿磨南州之鏡嗟會弔以
何期不禁感喟填膺欷歔掩卷也

紀浙東遊

乾隆三年九月乙丑同蔡君香谷爲浙東遊舟出盤門
由吳江平望溪河以達塘西丁卯至杭州草橋門渡錢
塘江風日晴朗望隔岸越山纍纍若可數旣渡肩輿至
西興爲蕭山境是夕大雨宿烏篷船百里至紹興府次
日雨不止乃投旅店飯櫂舟木蓮橋訪沈標元宜士宜
士命其僕擔行李留香谷與予住書堂堂之前爲園傳
爲南宋時沈家園鄰春波橋陸放翁會其故妻於此紀
以詞卽其地園有念昔軒澹影池廣半畝榆柳雜立旁
有飛閣閣南面秦望山東望禹陵北蓬萊若耶溪西面

塔山園爲宜士所購而念昔者以繼先人志也雍正初以他人事牽累没入官如例得給還猶守其地宜士子三十年老友也年七十六日行吟其中已巳宜士携其第五孫大鏞拏舟招予與香谷出東郭門泛鑑湖過渡東橋乃見遠近諸山峭厲或連或斷南行四五里爲禹陵陵在山半先過禹廟從西角門入有古篆書碑一入大門至享殿最後乃大殿方奉 詔修葺金碧飛湧殿東爲寔石亭石形如稱錘上銳斷處以石灰粘連之不知者以爲禹穴其地鄰南鎮以雨輒止辛未晴霽遊府山即臥龍山亦名蓬萊山舊爲越王勾踐宮殿今爲郡

治山蜿蜒洪鮮翔伏演迤一郡數百里之土壤千巖萬壑之勝皆在履舄之下更歷城隍山山有兩城隍神以上下分之下城隍神明洪武初將屠城兵士見神長數丈坐東郭門上遂不敢偏城得保全後人祀爲下城隍神以能禦民災也南出偏門經跨湖橋爲山陰道上山綿亘不可名狀王右軍云每行山陰道上如鏡中游王子敬又云鏡湖澄澈清流瀉注令人應接不暇者今予與香谷實暢遊焉拜馬太守廟守名臻漢順帝永和五年爲會稽守常疏鑑湖之水築隄溉田明嘉靖中郡守湯紹恩復築三江牖以瀦以洩皆效馬臻之所爲自漢

以來二千餘載無荒廢之田無水旱之歲力本利農皆
二公之澤也壬申尋戒珠寺誤至五雲門乃轉而至昌
安門寺爲右軍故宅有右軍塑像寺在戴山之麓山產
戴越王嘗采以食者有故明劉宗周念臺先生書院溪
流野色縈回鈎帶下有墨池已不可見矣去寺一里爲
題扇橋右軍題嫗六角扇處又過鎮東閣閣在城之中
唐元微之詩我是玉皇香案吏謫居猶近小蓬萊即此
青藤館在觀巷有徐青藤故里五字揭之石其天池乃
書堂前一小方池與青藤猶在耳紹興多山而城中之
山有八其至小者有二彭山在人家竹園蛾眉山在鎮

東閣旁土穀神香案下予僅遊府山戴山而已癸酉別
宜士返權至西興留題四詩於柯亭壁宜士命其孫漢
佐送大鏞來蘇就婚於香谷氏香谷詩有探珠盈几案
携玉返茅茨句蓋稱宜士之詩及指其五孫用樂廣事
也以風甚留西興旅店一日與香谷倡和有詩二章明
日渡錢塘江方未半中流作風浪時秋雨連旬水漲潮
不敵水勢也至草橋門已亭午方擬作西湖遊乃紆道
至錢塘門縱權於湖以微雨不及登山遙望青松紅樹
橋亭遊騎如小李將軍畫也青田劉氏謂會稽山層巒
複岡而無梯磴攀陟之勞大湖長溪而無激衝漂覆之

虞素宏道謂西湖如宋人畫細入毫髮山陰山水如元人畫意在隱約山陰顯於六朝西湖著於唐而會稽多園亭之勝平湖清淺嬉遊畫舫多野趣香谷持觴笑謂予曰邇日之遊蓋非偶然也自有此山水晉以來王謝支許諸公相嘯聚觴詠不知其幾然往復推移轉燭即為陳迹而我兩人垂老經此留連水石夫亦臭味有同之耶丁丑抵家昔柳子厚居嶺外日與賓客遊山水皆有記况越中佳山水耶遂記之其雲門秦望蘭亭五洩沃洲天姥諸山則願俟之異日香谷名芬居同里負經濟才嘗客山右遊中條山王官谷出雄武關至京師今

年亦七十餘矣九月晦日悔廬記

